



NESLUŽBENI PREČIŠĆENI TEKST
(„Sl. novine BPK Goražde“, broj: 4/20 i 9/21)

Bosna i Hercegovina
Federacija Bosne i Hercegovine
Bosansko-podrinjski kanton Goražde
MINISTARSTVO ZA BORAČKA PITANJA

P R A V I L N I K
O USLOVIMA, NAČINU I KRITERIJIMA
ZA UTVRĐIVANJE PRAVA NA BESPLATNU I POVLAŠTENU VOŽNJU

Goražde, septembar 2021. godine

Na osnovu člana 56. i 66. Zakona o organizaciji organa uprave u Federaciji BiH („Sl. novine Federacije BiH“ broj: 35/05) i člana 187. stav 5. Zakona o dopunskim pravima branilaca i članova njihovih porodica u Bosansko-podrinjskom kantonu Goražde («Službene novine Bosansko-podrinjskog kantona Goražde» broj: 9/13, 11/14 i 15/19), Ministar za boračka pitanja Bosansko-podrinjskog kantona Goražde, uz saglasnost Vlade Bosansko-podrinjskog kantona Goražde, **d o n o s i:**

P R A V I L N I K

O USLOVIMA, NAČINU I KRITERIJIMA

ZA UTVRĐIVANJE PRAVA NA BESPLATNU I POVLAŠTENU VOŽNJU

POGLAVLJE I-OPĆE ODREDBE

Član 1. **(Osnovne odredbe)**

Ovim Pravilnikom definišu se korisnici prava, uređuje način i postupak ostvarivanja prava na besplatnu i povlaštenu vožnju, podnošenje zahtjeva, obavezna dokumentacija, uslovi za ostvarivanje prava, prioriteti za ostvarivanje prava, način realizacije, finansiranje i ostvarivanje ovih prava.

Član 2. **(Korisnici prava)**

Pravo na besplatnu i povlaštenu vožnju mogu ostvariti lica iz člana 186. i 187. Zakona o dopunskim pravima branilaca i članova njihovih porodica (Službene novine Bosansko-podrinjskog kantona Goražde» broj: 9/13, 11/14 i 15/19) (u daljem tekstu: korisnici).

Član 3. **(Objava javnog poziva)**

Ministarstvo za boračka pitanja Bosansko-podrinjskog kantona Goražde (u daljem tekstu: Ministarstvo) za svaku godinu, a nakon usvajanja Budžeta Bosansko-podrinjskog kantona Goražde (u daljem tekstu: Kanton), objavljuje javni poziv za ostvarivanje prava na besplatnu i povlaštenu vožnju lica iz člana 2. ovog Pravilnika.

POGLAVLJE II-NAČIN, POSTUPAK I KRITERIJI ZA OSTVARIVANJE PRAVA NA BESPLATNU I POVLAŠTENU VOŽNJU

Član 4. **(Način podnošenja zahtjeva)**

(1) Zahtjev za ostvarivanje prava na besplatnu i povlaštenu vožnju korisnici iz člana 2. ovog Pravilnika podnose Gradskoj/općinskoj službi za boračko-invalidsku zaštitu sa prostora Kantona, (u daljem tekstu: Prvostepeni organ) prema mjestu prebivališta/boravišta.

(2) Podneseni zahtjevi za ostvarivanje prava iz stava 1. ovog člana važe za budžetsku godinu u kojoj su podnijeti.

Član 5.

(Obavezna dokumentacija za utvrđivanje prava na besplatnu i povlaštenu vožnju)

(1) Obavezna dokumentacija koja se podnosi za ostvarivanje prava na povlašteni prevoz u gradskom i prigradskom saobraćaju:

- a) Zahtjev sa tačnom adresom, JMBG i brojem kontakt telefona;
- b) Uvjerenje o boračkom statusu (ratni vojni invalid, porodica šehida i poginulog branioca);
- c) Fotokopija lične karte;
- d) Potvrda o mjestu prebivališta;
- e) Dokaz da se podnosilac zahtjeva ne nalazi u radnom odnosu;
- f) Izjava da ovo pravo ne ostvaruje po nekom drugom osnovu;
- g) Dokaz o uplati participacije za godinu dana.

(2) Potrebna dokumentacija za refundaciju sredstava na ime troškova prevoza djece bez oba roditelja koji su redovni studenti:

- a) Zahtjev sa tačnom adresom i brojem žiro-računa;
- b) Uvjerenje obrazovne ustanove o redovnom studiranju (podnosi se jednom u toku akademske godine uz prvi zahtjev);
- c) Original povratna karta/e sa tačno navedenom relacijom i datumom putovanja.

Član 6.

(Uslovi za ostvarivanje prava na besplatnu i povlaštenu vožnju)

(1) Pravo na besplatnu i povlaštenu vožnju mogu ostvariti samo korisnici kojima je mjesto prebivališta odnosno boravišta udaljeno više od tri kilometra od centra Grada Goražda.

(2) Pravo na povlašten prevoz u gradskom i prigradskom saobraćaju stečeno po ovom Pravilniku ne može se prenijeti na drugo lice.

(3) Izuzetno, od odredbi iz predhodnog stava ovog člana nosilac prava kod porodice šehida – poginulog branioca, može svoje pravo prenijeti na člana porodice poginulog branioca - šehida, koji je korisnik prava na porodičnu invalidninu, na osnovu konačnog rješenja nadležnog organa, izdatog u skladu sa važećim federalnim propisima iz oblasti boračko – invalidske zaštite.

(4) Pravo na povlašten prevoz u gradskom i prigradskom saobraćaju korisnici iz člana 2. ovog Pravilnika mogu ostvariti samo ako ovo pravo ne mogu ostvariti po nekom drugom osnovu.

Član 7.

(Postupak donošenja rješenja za priznavanje prava na besplatnu i povlaštenu vožnju)

(1) Prvostepeni organ, prema mjestu prebivališta podnosioca zahtjeva, rješava u prvom stepenu o pravu na povlašten prevoz u gradskom i prigradskom saobraćaju i o pravu na refundaciju sredstava na ime troškova prevoza lica iz člana 186. Zakona, ukoliko nije drugačije regulirano drugim propisom.

(2) Rješenje iz predhodnog stava, prvostepeni organ dužan je donijeti u roku od 30 (trideset) dana od dana podnošenja zahtjeva.

(3) Korisnik prava, dužan je u roku od 15 dana od dana nastale promjene prijaviti svaku promjenu koja utiče na korištenje, obim i prestanak ovog prava.

(4) Prvostepeni organi nadležni za boračko-invalidsku zaštitu će po službenoj dužnosti, na osnovu prijave korisnika prava ili saznanja na drugi način o nastaloj promjeni iz prethodnog stava ovog člana, pokrenuti postupak odmah, a najkasnije u roku od 15 dana od dana prijema zahtjeva, odnosno saznanja i donijeti rješenje o prestanku ili izmjeni priznatog prava na povlašten prevoz u gradskom i prigradskom saobraćaju, sa pravnim djelovanjem od prvog dana narednog mjeseca po nastaloj promjeni.

Član 8.
(Period korištenja prava)

Korisnicima koji ispunjavaju uvjete propisane ovim Pravilnikom, pravo na povlašten prevoz u gradskom i prigradskom saobraćaju pripada od prvog dana narednog mjeseca od dana podnošenja zahtjeva i važi do isteka roka ugovora zaključenog između Ministarstva i odabranog pružaoca usluga prevoza, kada je potrebno postupak obnoviti.

Član 9.
(Obaveza vođenja evidencije o korisnicima)

Prvostepeni organ vodi kompletnu evidenciju o korisnicima kojima je priznato pravo na povlašten prevoz u gradskom i prigradskom saobraćaju i dostavlja Ministarstvu mjesečne zbirne izvještaje o broju korisnika kojima je priznato ovo pravo.

POGLAVLJE III-REALIZACIJA PRAVA NA BESPLATNU I POVLAŠTENU VOŽNJU

Član 10.
(Dostava spiska korisnika odabranom prevozniku)

Prvostepeni organ dostavlja odabranom prevozniku spisak korisnika kojima je priznato pravo na povlašten prevoz u gradskom i prigradskom saobraćaju i zahtjev za izdavanje iskaznica za prevoz.

Član 11.
**(Odabir prevoznika za pružanje usluga prevoza
korisnika na besplatnu i povlaštenu vožnju)**

Izbor prevoznika za pružanje usluga za korisnike iz člana 2. ovog Pravilnika vrši Ministarstvo u skladu sa Zakonom o javnim nabavkama.

Član 12.
(Obavezno izdavanje iskaznice od strane odabranog prevoznika)

(1) Za korištenje usluga prevoza u gradskom i prigradskom saobraćaju odabrani prevoznik izdaje iskaznicu korisnicima koja važi od dana sticanja prava do isteka roka ugovora zaključenog između Ministarstva i odabranog pružaoca usluga prevoza.

(2) Iskaznica iz predhodnog stava se može izdati samo lično korisniku sa spiska iz člana 10. ovog Pravilnika uz pokaz dokumentacije koja dokazuje njegov identitet.

Član 13.
(Participacija troškova koji padaju na teret korisnika)

- (1) Od prihvaćene cijene godišnje iskaznice, ugovorene sa pružaocem usluga prevoza, korisnik participira sa 10%.
- (2) Korisnik uplaćuje participaciju direktno na račun pružaoca usluga i to unaprijed za godinu dana, odnosno za onoliki broj mjeseci koji je ostao do isteka ugovora zaključenog sa pružaocem usluga.
- (3) Izuzetno od prethodnog stava, djeca bez oba roditelja oslobađaju se participacije.

Član 14.
(Faktura za izvršene usluge)

U skladu sa odredbama iz prethodnog člana, odabrani prevoznik će fakturirati usluge prevoza Ministarstvu, uz tabelarni prikaz koji sadrži: spisak sa potpisima korisnika kojima su izdate iskaznice, borački status, procenat učešća Ministarstva, mjesto prebivališta i obračun visine troškova koji idu na teret Ministarstva.

Član 15.
(Postupak po žalbi)

Nad rješenjima donesenim u prvom stepenu i postupak po žalbi provodi Ministarstvo.

POGLAVLJE IV-NAČIN I POSTUPAK OSTVARIVANJA PRAVA NA BESPLATNU I POVLAŠTENU VOŽNJU DJECE BEZ OBA RODITELJA KOJI SU REDOVNI STUDENTI I PRATIOCA

Član 16.
(Način i postupak ostvarivanja prava na besplatnu i povlaštenu vožnju djece bez oba roditelja koji su redovni studenti i pratioca)

Pravo na besplatnu i povlaštenu vožnju lica iz člana 187. stav 3. i 4. Zakona o dopunskim pravima branilaca i članova njihovih porodica ostvaruju na način propisan odredbama člana 4., 5., 6., 7., 8., 9., 10., 11., 12. i 15. ovog Pravilnika.

POGLAVLJE V- FINANSIRANJE

Član 17.
(Obezbjeđenje sredstava)

Finansiranje prava iz ovog Pravilnika za svaku godinu obezbjeđuje se do visine sredstava odobrenih za ove namjene iz Budžeta Kantona.

POGLAVLJE VI- PRELAZNE I ZAVRŠNE ODREDBE

Član 18. (Prelazne odredbe)

Nadzor nad priznavanjem prava i odobravanjem sredstava po ovom Pravilniku vrši Ministarstvo.

Član 19. (Način izmjena i dopuna)

Izmjene i dopune ovog Pravilnika se vrše na način i po postupku koji važi za njegovo donošenje.

Član 20. (Tumačenje)

Tumačenje odredbi ovog Pravilnika daje Ministar.

Član 21. (Primjena Zakona o opštem upravnom postupku)

Odredbe Zakona o upravnom postupku („Sl. novine FBiH“ broj: 2/98 i 48/99), primjenjuju se u svim pitanjima koja nisu uređena posebnim Zakonom i ovim Pravilnikom.

Član 22. (Stupanje na snagu Pravilnika)

Ovaj Pravilnik stupa na snagu danom dobijanja saglasnosti od Vlade Bosansko-podrinjskog kantona Goražde, a naknadno će se objaviti u „Službenim novinama BPK Goražde“.

Broj: 11-11-193-2/20
Goražde, 04.03.2020. godine

MINISTAR

Edin Aganović

Na ovaj Pravilnik Vlada Bosansko-podrinjskog kantona Goražde dala je saglasnost svojom Odlukom broj: 03-11-391/20 od 28.02.2020.godine i broj: 03-11-1345/21 od 05.08.2021.godine.